

Date – 28/05/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. State chungah Thli leh ruah a thawh nat avangin School Education Dept chuan vawiin hian zirna in zawng zawng khar turin thupek a chhuah.**
- 2. Chite Lui humhalh tur a hmalakna chungchangte chiang zawk a hre turin Chief Minister Pu Lalduhoman Save Chite Lui Executive Committee aiawhte a kawm.**
- 3. Lok Sabha inthlan thawh sarihna leh a hnuhnung ber atan campaign in a vanglai a thleng mek.**
- 4. Papua New Guinea-a leimin avanga thi zat chu mi 670 an tling tawh.**



HOLIDAY

State chungah Thli leh ruah a thawh nat avangin School Education Dept chuan vawiin hian zirna in zawng zawng khar turin thupek a chhuah a, Disaster Management & Rehabilitation Dept nen inrawnin, harsatna liantham a thlen loh nan he ruahmanna hi siam a ni.

Cyclone Remal si per avang hian Mizoram hmun hrang hrangah nimin tlai atang khan ruah leh thli na takin a thawk a, veng leh khaw kar kawng leimin a awm zeuh zeuh bakah, mihring tawrhna leimin a thleng ni a thudawn a ni a, thuchiang zawk ngaihchan mek a ni.



HOME COMMISSIONER

Home Commissioner Pu H. Lalengmawia chuan state pawna Mizoram Police duty mi 1047 ten Lok Sabha inthlana vote an thlak theih nan theihtawp chhuah mahse Mizoram Police te chu inthlan puan hnuah ECI thuhnuai a awm annih avangin tih theih an nei lo tih a sawi a, Police te vote thlak theih loh chhan mi thenkhatin state sawrkar inthlahdah vang an tih chu vanduaithlak a tih thu a sawi.

He thu hi nimina Chief Secretary Conference Hall-a thuthar thehdarhtute an kawmna ah sawiin inthlan puan anih atangin Election Commission thuhnuai awm annih angin state sawrkar a inrawlh vek a remlo a ti.

Mizoram DGP Anil Shukla sawi danin Mizoram Police 1047 te chu tun thlengin State dangah Parliament inthlan duty in an awm a, heng te hi Sawrkar laipua Ministry of Home Affairs thupek angin duty turin March ni 28, ni 29 leh ni 30 ah te chhuahtir tura thupek an hmu a, CEO hnenah postal ballot in vote thlak an dil a, nomination hnuh let hma chuan postal ballot hmangin vote thlak theih a ni lo a, an tirchhuah hnuah chauh Nomination withdraw hun a tawp a ni.

Mizoram CEO kaltlangin ECI thlengin vote thlak anih theih nan theihtawp an chhuah tih sawiin vote an thlak dan kawng a awmlah avangin pawl a tih thu a sawi.

<><><>

CM

Chite Lui humhalh tur a hmalakna chungchangte chiang zawk a hre turin Chief Minister Pu Lalduhoma chuan a pisa-ah Save Chite Lui Executive Committee aiawhte a kawm a, an hmalak tawhna hrang hrangte a ngaithla a, an hmachhawp bawhzui dan turte a sawipui bawk a.

Save Chite Lui Executive Committee hruaitute chuan Chite Lui tana beihna (Save Chite Lui Movement) chu kum 2007 a bul tan a nih thu leh kum 2017 atanga awmze nei lehzuol a kalpui chhoh zel a nih thu an sawi a. Comprehensive Action Plan a ruahman sa angin hmalakna kalpui a nih thu leh Action Plan Phase I chu zawh chhoh mek a nih thu Chief Minister hnenah an hrilh a. Phase I chhunga hmalakna hlawm lian zingah Baseline Survey te, nasa taka public awareness siam leh dan hmang a lui humhalhte chu hlawhtling tak a hlen chhuah a ni tih tarlan a ni a.

Chite Lui hi Indian Army in Adopted River atana an thlan thute, Prime Minister Radio Programme Mann ki Baat (MKB) ah tarlan a nih thute, MKB ah tarlan a nih avangin sorkar laipui atangin duhsakna leh chhawmdawlina tam tak a awm theih dante sawiho a ni a. Save Chite Lui Movement avanga Mizo mipuite thinsungah kan ram a luite humhalh duhna kawng a harhtharna a lo piang zel leh note engemawzat a hring zelte hi chanchin lawmawm a nih thu tarlan a ni.

Action Plan Phase II angin Riverfront Development atan sorkar laipui atanga sum hmuh dan tur sawiho a ni a. Bawngkawn ram a Chite Lui hnar atanga Bethlehem Vengthlanga World Bank Road-a PWD Lei (bridge) thleng a Chite Lui kam tuak riral zel tur venna tura lungrem dan turte sawiho a ni bawk a.

Chief Minister leh Save Chite Lui Coordination Committee Chairman ni bawk hova thutkhawm zui chungchang pawh sawiho a ni bawk a ni.



PC PARTY & AAP

People Conference PC Party leh AAP Mizoram ten MLA 16, Dan kalha an thuneihna piah lama nihna chelha an hriat avangin dan anga hma la turin Assembly Speaker Pu Lalbiakzama hnenah lehkha an thehlut.

Party pahnih te hian nimin khan Assembly Speaker Pu Lalbiakzama hnenah lehkha hi an thehlut a, PC Party President Pu Vanlalruata sawi danin, dan ang chuan, MLA pakhat tan Assembly Subject Committee pakhatah bak a tel theih loh lain tun dinhmunah MLA 16 te chu Subject Committee pakhat aia tamah an awm mek a ni.

Hei bakah hian Minister te chu Assembly Committee ah an tel a rem loh lain, tun Ministry a Minister of State dinhmun ang pek, Adviser to CM mi 4 te chu Assembly committee ah an tel bawk a, Ethics committee ah Govt. Chief Whip te leh Minister te tel a rem loh lain Deputy Chief Whip leh Minister, an vaiin mi 4 an tel bawk a ti a, hetiang Assembly committee hrang hranga Minister leh MLA te an tel tam chuan, thil dik lo chhuitu tur ber Committee chu a din chhan ang a nih phak loh an hlah avangin Assembly Speaker hnenah siam tha turin an ngen tih a sawi a, MLA te hetiang mawhphurhna tam zawk an pe duh a nih pawhin mawhphurhna tam zawk an chelh theihna dan chu siam tha zawk mai turin an ngen tih a sawi bawk a ni.



FAW

Hnahthial ah Vaimim eichhetu Pangang, Fall Army Worm hmuhchhuah thar a ni a, kuminah hriat vawi khatna a ni.

Vaimim eichhetu pangang Fall Armyworm hi School of Agricultural Sciences (SAS) zirlai naupang ten thlai an chin Vaimim hmun ah hmuh a ni a, an Vaimim chin te hi organic leithaa chawm leh chemical leithaa chawm, hmun hnihah an siam a, organic leithaa chawmna hmun bikah hian fall armyworm hi a awm duh bik ni a an hriat thu SAS zirtirtu pakhat chuan a sawi.

Thuneitute chuan pangang puang tur vengin theih tawp an chhuah mek tih an sawi a, tirem tur hian rannung thahna hlo hmang lovin, thang an kam a, hei hian he rannung puang nasa lutuk tur a ven theih an beisei thu an sawi.

Fall armyworm hi kum 2019 atang khan kumtinin Mizoramah a puang thin a, vaimim hmun a bei ber a, vaimim eitur a hmuh loh chuan thlai dang pawh a bei chhonzawm mai thin tih mithiamte chuan an sawi a ni.



KHAWZAWL

Nimin khan Khawzawl DC Meeting Hall-ah Khawzawl District ‘Inspection and Monitoring Committee on Prevention of Illegal Transportation of Children’ chu an Chairman Khawzawl Bawrhsap Pu K. Lalrohlua hovin an thu khawm a. Dan kalha naupang kumtlinglo hruai bo tih tawp leh ven dan tur an sawi ho.

Pu K. Lalrohlua chuan Naupang kumtlinglote venhimna kawngah an mit leh beng len a, theihtawp chhuah theuh turin a ngen a ni. Chairman hian inlawmna thu a sawi zawhah Khawzawl District chungang naupang venhimna kawnga thawktu – District Executive Force (SP Office), District Child

Protection Office (DCPO) leh Child Welfare Committee (CWC) te hnen atangin an hmalakna leh hmachhawp hrang hrang te ngaihthlak a ni.

Khawzawl District Child Protection Officer Pi Lalsiammawii chuan Mizoram chhunga naupang hruai bona case hrang hrang awm tawh te a sawi fiah a. Thiam thil bik nei lo tan ram pawnah pawisa tam tak hlawh ngawt a theih loh thu mitinin an hriat a tul tih a sawi.

Khawzawl District SP Pu Lalchhuanthanga chuan Mizoram Police hnuaiah District tinah Anti-Human Trafficking Unit din a nih thu a sawi a. Mihring hmanga insumdawna kaihnawih chu SP, CID (Crime) hnuaiah chhui thin a nih thu te, Khawzawl Police Station-ah pawh Child Friendly Room leh Women Help Desk te dah a nih tawh thu a tarlang bawh. Khawzawl District Child Welfare Committee Chairman Pu PC Rosiama chuan ramdanga hnathawh tum te chu Agency rintlak kaltlanga kal hram hram tura inzirtir a tul thu leh High School leh Higher Secondary School-ah te zirtirna kal pui thaa a hriat thu a sawi.

Thutkhawm chuan Khawzawl SP hnuaia Anti-Human Trafficking Unit chu chak zawka kal pui tha an ti a. District Child Protection Office-in High School leh Higher Secondary School-ah Human Trafficking kaihnawih inzirtirna kal puina tur 'Handout' lo buaipui se, zirtirna hi Elementary School-ah te pawh kal pui tum ni se tiin an rel a ni.

<><><>

CAMPAIGNING

Lok Sabha inthlan thawh sarihna leh a hnukung ber atan campaign in a vanglai a thleng mek.

Congress President hlui Rahul Gandhi chuan nimin khan Bihar-a Khusrupur ah thusawiin NDA sawrkar chuan ramchhung thalai vaibelchhe 2 chuang kumtin hna nei lo in a siam a ti a. Prime Minister Narendra Modia chuan hemi chungchang hi a sawifiah ngei a ngaih thu a sawi bawh a ni.

RJD leader Tejashwi Yadav pawhin Ghoshi ah hun a hmang bawh a. Senior BJP leader leh Madhya Pradesh CM Dr.Mohan Yadav pawhin Patna-a Maner hmunah hun a hmang a. JD (U) President leh Bihar Chief Minister Nitish Kumara'n Nalanda bialah vantlang inkhawm a huaihawt bawh.

<><><>

DR, JAISHANKAR ON PAPUA NEW GUINEA LANDSLIDE

Papua New Guinea-a zirtawpniaa leimin avanga thi zat chu mi 2000 chuang an tling tawh.

External Affairs Minister Dr. S. Jaishankar-a chuan Papua New Guinea-a leimin avanga mi tam tak an thi chu pawh a tih thu a sawi. Social Media-a a thu dahah Pu Jaishankar-a chuan Papua New Guinea mipui leh sawrkar te India mipuiten an tawrhpu takzet a ti a. An hun harsa tawh mekah tanpui turin a inpeih reng a ni a ti.

Puan tawh angina Vanduaiana thlenna hmun hi Enga province-a Kaokalam kuaah a ni a. Chenna in 1100 chuang leiminin a chhilh a ni. Mulitaka Province ah pawh thingtlang khaw parukah leimin nasa avang hian harsatna an tawh a ni.

Papua New Guinea hi Australia hmarlama awm thliarkar a ni a. Hnam chi hrang hrang awmna niin tawng chi 800 chuang hman a ni a. Mihring maktaduai 10 vel an cheng a ni.

<><><>